

DE
VERBO HOMINE

FACTO

PUBLICA DISERTATIO

QUAM

Illustrissimo ac Reverendissimo

D. D.

PAULO FRANCISCO JUSTINIANO

EPISCOPO TARVISINO

DUCI MARCHIONI ET COMITI

S. S. D. N. P. P.

Prælate Domestico, & Pontificio folio Episcopo assistenti &c.

D. O. C.

DOMINICUS ZANUSIO

DE ORMELLIS

Seminarii Tarvisini Alumnus.



TARVISII,

MDCCLXXVI.



TYPIS SEMINARII EPISCOPALIS,

APUD JULIUM TRENTO

SUPERIORUM PERMISSU.



Illustriss.^{me} ac Reverendiss.^{me}

P R Æ S U L

JActa est alia. Quæ in privata palestra
exagitavi, nunc ætate non satis firma,
& ingenio non satis litterarum cultura subacta
in publicam concertationem proferre audeo,
& magna, gravissimaque de Verbo Homine fa-
cto pertractare. Quemadmodum enim Publius
ille Cornelius Scipio, qui postea ex victoria
Africanus est appellatus, cum sibi ædilitatem
petenti Tribunos Plebis adversarios haberet,
quod ad petendum nondum legitima ætas esset:

A 2

sa-

fatis, *inquit*, annorum habeo, si me Quirites habilem facere volunt: ita & mihi sat esse omnia non dubito, si habilis per Te unum efficiar, cujus beneficia in me tanta, tamque ingentia alta mente reposita nulla unquam delebit oblivio. Equidem me non latet Socratem olim de rebus Philosophicis disputaturum coram Phædro prius sibi pallio caput obnupsisse, quam institutam provinciam aggrederetur; propterea quod baud parvi periculi sibi esse ducebat cum summi Platonis discipulo in disputationem venire. Qua de re, si præclaro illi Philosopho, qui Apollinis oraculo omnium sapientissimus fuerat judicatus, unius eruditi viri præsentia tam gravem intulit timorem, ut sue contentionis puderet, formidolosum hominem quid dissimulem? Etenim me commovet rerum transandarum gravitas, ac difficultas. Persentio arduam pugnam laboris, maximique periculi plenam. Obsecratos, perditosque Judæos aggredior, quibus Divinæ Incarnationis altissimum, & ineffabile Sacramentum scandalum videtur;

Gen-

Gentilium deliramenta, & furorem penitus subvertere tentandum mihi est, quæis præcipuum hoc Fidei nostræ momentum videtur stultitia; Audaciam tandem, temeritatemque quamplurimum hæreticorum irridere, & exagitare mei officii esse debet, qui pro modulo suo aberrantes sophismatibus, & innumeris cavillationibus tam Sacrum, tamquam Divinum Mysterium miserandum in modum vel contaminare, vel funditus evertere conantur, dum vel duplicem in Christo adstruunt Personam, vel perfractæ duas negant naturas, vel duplicem voluntatem recognoscere refugiunt, & Christum pro omnibus passum renuunt confiteri. Me etiam deterret temporis brevitæ, qua solidis hisce disciplinis operam tradidi; & me haud parvo terrore afficit nobilis doctissimorum confessus, ac præsentia, quorum acre judicium summopere pertimescendum intelligo. Hæc omnia ita me afficiunt, & tantam vim habent ut & singula me a proposita via deterreant. Quid igitur in tanta animi mei perturbatione, & terrore con-

fili

fili capiam? Quo me vertam, nisi ad tuam clementiam Præsul Amplissime? Te igitur unum intueor, cum ad Te unum spectet omnis disputatio hæc mea. Et ob quantum, Amantissime Pater, sentitis animus roboris, alacritatis, & lætitiæ, dum in Te unum oculos injicio, qui quantum splendoris, & dignitatis huic meæ concertationi adjicis præsentia, tantum præclara merita tua, nihil esse tam disertum, nihil tam elaboratum ingenio, nihil denique ita ex omni parte perfectum, quod Tibi ex æquo respondere possit, non obscure declarant.

Non is sum, qui eximiam virtutum tuarum gloriam, oris, animique benignitatem, summam in difficillimis rebus dexteritatem valeam recensere, aut quanti existimari debeant, dicendum sumam. Modestia illa tua singularis tibi prope congenita laudes omnes interdicat, & non laudari, sed laudanda facere patitur. Præteream igitur omnia. At silentio non prætermittam permagnam illam sollicitudinem tuam, atque incredibilem vigilantiam in promovendis studiis,

✻ (VII) ✻

*diis, augendaque pietate ad sapientissimum illud
vetus effatum, quod quæ ad Deum ducit via
est pietas cognitioni conjuncta. Quis enim
non admiratur multa, & gravissima bujusce
virtutis tua monumenta? Satis clare loquuntur
& Seminarium hoc a Te uberius amplificatum,
& novæ scholæ in eodem per Te apertæ, quæ
cum incipiant a Latine, Græcæque linguæ in-
stitutione, & viam sternunt ad omnem littera-
turam, & elegantiam, & sic adolescentes per
politiorum litterarum studia ad severiores omnes
disciplinas traducunt. Quis non admiratur so-
lertem illam curam, ac diligentiam, qua se-
lectos ad quamlibet disciplinam libros undique
comparare studes; atque nullum subsidii genus
ad artes, scientiâsque omnes fovendas clarissi-
ma hac in Civitate desiderari possit, & in
propriis laribus ad omnium Civium commodum,
& utilitatem Bibliothecam instituisi, & alte-
ram hanc in Seminaria Præceptorum præsertim
usui accommodatissimam: quò fit, ut nihil in-
tentatum relinquo, quod omnium animos ad
veræ,*

vera, solidaque pietatis, & virtutis cultum valeat informare, & consolidare. Sed tempus me deficeret, si singula, quæ te circumstant decora, & ornamenta, persequi vellem. Id unum igitur superest, ut Vos, Auditores Ornatissimi, Nobilissimi, quos comitate animi singulari huc frequentes adesse video, emixe obsecrem, ut & disputationem banc meam, non ex sapientia vestra, sed ex mea imbecillitate metiri non recusetis, & qua soletis benignitate, quidquid incomptum, atque invenustum auribus vestris appulerit, adolescenti Theologicis studiis non satis imbuto, ac primo in publicam prodeanti perhumaniter condonare velitis. Te interim, Præsul Amplissime, Amantissime Pater, rogo, atque obtestor, ut me in tuam clientelam suscipias, tuoque favore, tuaque virtute ita me multis de causis desperantem prosequaris, ut quantum ille timoris, & formidinis addunt, tantum lenitas tua, atque auctoritas me erigat, foveat, atque confirmet. Hoc si sentiam, me non mediocrem laborum meorum fructum intelligam percepisse.

DE

DE VERBO HOMINE FACTO..

I.

NON in solo opere virtutis, aut in sola observantia mandatorum, sed etiam in tramite fidei angusta & ardua via est, quæ ducit ad vitam: & magni laboris est, magnique discriminis inter dubias imperitorum opiniones, & verisimiles falsitates per unam sanæ doctrinæ semitam inoffensis gressibus ambulare: & cum undique se laquei erroris opponant omne periculum deceptionis evadere (a). Hoc maxime intelligimus cum de Verbo homine facto instituitur disceptatio: nam nullibi & major opinandi lascivia reperitur, & tam multiplex, & tam copiosa hæresum ubertas, dum fidei simplicitate neglecta, humanis ratiocinationibus, & græcæ Philosophiæ ope ac præsidio summa, & incomprehensa percipere contendunt homines potius quam fide consequi (b). Hanc procul dubio unam præcipuamque rationem credimus, ac judicamus, propter quam multi magnum hoc pietatis Sacramentum vel omnino non credunt, vel non sicut est credunt. (c) Quapropter cum magnum bonum conferat inquisitio veritatis,

B

tis,

(a) S. Leo serm. 5. de nat. (b) S. Athan. (c) S. Fulg.



tis, quæ tamen; ut ait Fulgen. (a) tunc desiderato non frustatur effectu, cum rectis ad veri cognitionem lineis animus intendatur; cumque disputatio hæc nostra *credenda non intelligenda* respiciat, dicam cum S. Amb. (b) *Janna nostra fides est: & instar fundamenti se habent: Scripturæ; Synodi. Æcumenicæ, perennis Sanctorum Patrum sententia.*

II.

Habet Theologia plura (quod non inficior) quæ intellectu comprehendere possunt homines, notiones videlicet, dogmata, quæ ex fidei deducta principiis, & iis innixa commentando, & differendo colliguntur: unde Petrus ad Christum: *& nos credimus, & cognovimus, quia tu es Christus filius Dei* (c). Quæ verba nos edocent rectum hunc esse ordinem, sequendam & semper tenendam hanc normam, uti prior sit fides, qua credimus, quam cognitio: ut Basilius, Augustinus, & præcipue Cyrillus Alexandrinus hisce verbis nos admonet (d): *Post fidem cognitio sequitur; non illam antecedit, quemadmodum scriptum est: si non credideritis, non intelligetis. Postquam enim basis instar constituta fuerit in nobis simplex, nec curiosa fides, super hac deinceps, ac paulatim cognitio struitur, quæ nos ad mensuram ætatis quæ, in Christo est, attollit, & ad virum perfectum, & spiritualem.* In his igitur, quæ nobis credenda proponuntur, absit, ut dux & magistra sit ratio. Recognoscimus enim rationem quasi ancillulam, & pedissequam, quæ non debet mentes meliori luce afflatas regere, ac ducere, quo velit, sed potius obsequi, ac præsto esse ad tutelam, ac ministerium.

Hinc

(a) ad Tract. l. 2. c. 4. (b) in psal. 116. (c) Joan. c. 670.

(d) lib. 4. com. in Joan.

(XI.)

Hinc Petrus Damiani ait (a) *hæc humana mentis peritia; si quando tractandis sacris eloquiis adhibetur, non debet jus magisterii sibi met arroganter arripere: sed velut ancilla domine quodam famulatus obsequio subservire: ne si præcedit oberret: & dum exteriorum verborum sequitur consequentias, intima virtutis lumen, ac rectum veritatis tramitem perdat.*

III.

Hiscæ igitur jactis fundamentis, nos ea, quæ de Verbo factò homine credenda proponit Catholica Fides, a triplici veluti perenni fonte: nimirum Sacra Scriptura, Synodis Æcumenicis, & constanti SS. PP. sententia deducenda esse non dubitamus; atque ideo profiteamur Dei Verbum, quod in principio erat apud Deum, & Deus erat, hoc est unicum Dei filium consempiternum in nullo a Patre esse differentem: hunc conceptum de Spiritu Sancto, de Maria Virgine natum, & carnem factum, qui propter nostram salutem descendens de Cælis, semetipsum exinavit formam servi accipiens in similitudinem hominum factus, & habitu inventus, ut homo.

IV.

Eximium hoc divinæ misericordiæ opus, & magnum pietatis Sacramentum, quod Judæis videtur scandalum, gentibus stultitia, Socinianis aliisque ejusdem farinae hominibus summæ contradictionis, & implicantæ, ut ab omni errorum præstilentia, & calumniis vindicemus; possibilitatem ejus, seu non repugnantiam,

B 2

five

(a) Opusc. 36. c. 5.

✻)(XII.)(✻

sive ex parte Divini Verbi sumatur, sive ex parte humanæ naturæ, sive ex parte unionis, propugnamus, & constanter dicimus incarnationem possibilem omnino esse, Divina operante virtute.

V.

Hinc ad Judæorum pervicaciam retundendam gradum facimus, qui quamquam dubitare minime possint, Deum suam reparandi homines voluntatem Adamo primum, tum aliis permultis e Patriarcarum, & Prophetarum numero indicasse; futurum aliquando Messiam, qui universum redimeret populum, perpetuamque felicitatem hominibus adipisceretur; (quæ revelatio profecto in causa fuit, ut veteres ex Judaica gente præsertim summa sedulitate, atque summo animi ardore tempus, quo venturus Messias, explorassent) attamen ad persuadendos incautos etiam nunc præstolandum promissum reparatorem jactitant, ac proinde, a majoribus suis recedendo, nullum in Scripturis certum esse Messie tempus assignatum, & Deum sibi arcanum illud reservasse constantissime pugnant: immo eò obstinata, & obcecata ipsorum perfidia devenit, ut sub gravissima imprecatione, & anathematis pœna prohibuerint, ne quis eorum adventus Messie periodos, tempusque computare auderet: *Inflata rumpantur ossa eorum, qui periodos computant.* (a) Hos igitur alloquar cum Seneca:

Compesce verba: parce jam demens nimis

Animosque minue (b).

En clarissimum Jacobi morientis vaticinium, Gen. c. 49. v. 10. *Non aufe-*

(a) Thalm. cod. Sanhedrin c. 4. (b) Medææ ast. 1.

❧ (XIII) ❧

auferetur &c. Quod quidem vaticinium personam Messiae unice respicere, suumque habuisse complementum tam clare nobis compertum est, atque exploratum, ut ex illo apertissime tempus Messiae adveniens demonstratum contendamus, & statuamus invicte ex illo demonstrari Messiam advenisse.

VI.

Danielis hebdomadae, quae leguntur c. 9. v. 24. & seq. revincunt quoque recutitos Judaeos. Has annorum hebdomadas volumus intelligendas, ac supputandas, non ab exitu sermonis Angeli, sed ab exitu sermonis ut aedificetur Jerusalem, seu a promulgato Regis Persarum edicto, quod certe illud esse nequaquam potest, quod tulit Cyrus anno primo regni sui, aut Darius Histaspis, vel Artaxerxes Longimanus anno imperii sui 7. sed illud, quod anno 20. edidit idem Artaxerxes.

VII.

Adfunt & permulta alia profetica oracula satis idonea ad refellendam Judaeorum perfidiam, ut Deuter. (a) Michae (b) Aggei (c) & praecipue Isaiae, qui singulis fere, & integris capitibus adeo clare & aperte Messiae tempora adnotavit, & ipsum Christum ita designavit, ut Hieronymus scite, & eleganter more suo, non tam prophetiam, quam Evangelium, & Christi historiam Isaiam texuisse scripserit (d) Quid ad haec reponunt Judaei? Hi duræ cervicis homines non

La-

(a) cap. 18. v. 25. 18. (b) cap. 5. v. 2. (c) cap. 3. v. 8. 19.

(d) Ep. ad Paulinum, & Pref. in Isaiam.

*Laxo meditantur arcu**Cedere campis (a):*

Sed alios impudentissime intrudunt Messias: nimirum Dositheum, Simonem Samaritanum, Barchochebam, Davidem Eldavidem, ac Vespasianum ipsum suæ perditionis auctorem. Verum experientia edocti hos omnes impostores fuisse jam coguntur fateri. Confe- rant, nunc si lubet, veteris Testamenti loca, in quibus veri Mes- siæ characteres adumbrantur: subiiciant tum Evangelistarum ver- ba, quæ vaticiniorum in Christo complementum ostendunt evi- dentissime, & fateantur necesse erit Jesum Nazarenum verum fuisse Messiam, a Deo Prophetarum ore promissum:

VIII.

Eadem veritas magis magisque elucescet, si ad miracula à Christo patrata animus intendatur, non eo tantum titulo quod nequeant fieri in confirmationem erroris, sed etiam quod Messie adventus notis indicant singularibus. Quis enim nisi a Deo mis- sus, vel Deus de Deo cæcos illuminare, surdis reddere auditum valet, gentia debilia roborare, claudos sinare, mortuos ad vi- tam revocare, ut Isaias vaticinavit futurum de Messia? nonne hæc omnia præstitit Christus, ut legere possumus apud Evange- listas? nonne stella, quæ in Oriente apparuit in Christi nativita- tes visibilis Spiritus Sancti descensus in Baptismate; solis obte- nebratio in ejus morte Plenilunii tempore, & in Meridie jam prænuntiata ab Isaiâ, & Amos apertissime conclamant Jesum ve- rum

(a) Hor. od. 8 lib. 3.

✠)(XV.)(✠

runi Messiam? *Noli* (ergo o Judæ) *esse stultus, ne moriaris in tempore non tuo* (a).

IX.

Cum autem Messiam e Vergine nasciturum aperte enuntiet Isaiæ vaticinium c. 7. v. 14. *ecce Virgo concipiet &c.*, quod & uni Christo convenire, & in solo Christo completum fuisse profiteamur; nos ut magis magisque elucescat Jesum fuisse verum Messiam, firmiter constanterque pronuntiamus ipsum e Matre Virginæ conceptum, & in lucem editum absque Virginalis claustris, nec non Mariam ad mortem usque propriæ virginitatis immaculatum lilium servasse, quidquid ausu temerario, ac animo pertinaci vel Judæi, vel Hæretici in contrarium possint effutire.

X.

Christum e Spiritu Sancto conceptum suum corpus non aliunde, sed materna traxisse ex carne, proclamant Scripturæ, profitemur Ecclesia. Quapropter merum somnium putamus quod Valentinus, Basilides, Marcio, & Manichæi ausi sunt venditare, nulum nisi phantasticum corpus habuisse. Cum enim nobis constet Christum vere, & naturaliter passum, acceptis passionibus prout præcise afficiunt animum, aut sensus corporis, necessum est asseramus, verum habuisse corpus compactum ex carne, ossibus, & sanguine, aliisque hujusce generis fibrillis, quæ ad humanam naturam pertinent.

Si

(a) Ecclesi. c. 7. v. 18.

XI.

Si autem Christo verum, & non phantasticum corpus attribui-
mus, veram animam, & quidem omnibus suis perfectionibus præ-
ditam, Verbum assumpsisse non dubitamus, quemadmodum Scri-
ptura, Patres, & Theologica argumenta evincunt evidenter. Un-
de merito damnamus Apollinaristas autumantes vicem animæ
præstasse Divinitatem, solam sensicivam animam Christo attri-
buentes.

XII.

Est igitur Christus verus Messias, verusque Deus & homo. De-
us ex substantia Patris ante sæcula genitus, & homo ex substan-
tia matris in sæculo natus. Perfectus Deus, perfectus homo ex
anima rationali, ex humana carne subsistens: æqualis Patri se-
cundum Divinitatem, minor Patre secundum humanitatem.

XIII.

Qui licet Deus sit & homo, non duo tamen, sed unus est
Christus. Unus autem non conversione divinitatis in carnem, sed
assumptione humanitatis in Deum. Est igitur Christus unica
persona in duabus naturis consistens, & non quantum ad huma-
nam attinet naturam, sed quantum ad personam, est ipsum Ver-
bum, quod fuit ab initio, quod est splendor gloriæ, & figu-
ra substantiæ Patris, verus Deus, antiquior Abrahamo, & in
æternitate permanens in sinu ejusdem Patris: unde reprobamus,
damnamus, anathematizamus Nestorium, ejusque assecclas negantes

Ver-

✠)(XVII.)(✠

Verbum Dei in unitatem personæ humanam sibi copulasse naturam.

XIV.

Quem igitur enixa est Virgo mater, est idem filius Dei, & quidem non adoptione, sed nativitate, generatione, & natura. Quapropter Mariam, quæ concepit, peperit, genuitque verbum unigenitum Dei filium, recte Deiperam appellandam censemus.

XV.

Unicam in Christo personam venerantes, duas naturas, humanam nempe & divinam, in eodem confitemur, ut post adunationem naturæ duo sint distinctæ invicem atque impermixtæ, licet separatim minime subsistentes, sed in eadem hypostasi & persona unitione physica, & substantiali copulatæ. Jure itaque meritoque Eutychianum dogma a Facundo Hermianensi appellatum scitum profanum ac fatuum, proscribimus, & damnamus.

XVI.

Quoniam vero quorum, ut ait Damascenus, (a) diversa natura est, horum est diversa actio, duas agnoscimus in Christo voluntates; & operationes adversus Monotelitas. Admittimus etiam in Christo communicationem idiomatum, respectu tamen personæ, non vero respectu naturæ. Quare debemus, quæ vero Deo conveniunt, Divinitati ejus, quæ homini, humanitati nostræ, quam propter nos assumpsit, accomodare (b).

C

XVII.

(a) Lib. 3. de fide cap. 15. (b) S. Cyril. in X. Thesaur.

XVII.

Hinc supinus error, hæresis est execranda *Ubiquistarum* sententia, qui autumant vi unionis hypostaticæ convenire humanæ Christi naturæ omnipræsentiam. Hanc equidem propugnarunt primo Joannes Brentius, Jacobus Andreas Schimdelius, tum Lutherani quamplures; & postquam satis cessit Melanchthon, navante operam Illyrico, hanc ipsam opinionem fere omnes Lutherani amplexati sunt; Verum auctoritate Scripturarum, Patrum traditione, & ratione ipsa Theologica, eam facili negotio refelli posse judicamus.

XVIII.

Sempiternus igitur mortalitatem, Incircumscriptus formam nostram assumpsit, semetipsum humiliavit usque ad mortem, factus est peccatum, & maledictum, e cruce pendit, ut pretiosi sanguinis lytro nos a captivitate reduceret, principem tenebrarum ejiceret, inferni spolia diriperet, ac regnantis mortis imperium destrueret. Ingentem hanc Redemptoris beneficentiam, ac soluti pretii dignitatem, atque oblationem temere, audacter, sacrilege parvi pendunt Hæreticorum complures, vel ad solos prædestinatos circumscribendo, vel ad neminem præsertim veram Redemptionem pertinere impie dogmatizantes. Damnatæ hæc opinioniones abjurantes asserimus Christi Domini redemptionem ad homines universos & singulos pertinere, in quorum numero & fœmineum sexum comprehendimus, quidquid Horatius Plata in contrarium protulerit.

XIX.

Cumque Christi merita infiniti pretii consideremus, exhibitam ab ipso satisfactionem per mortem, quam pertulit, recognoscimus superabundantem, omnesque conditiones habere, quæ ad exactas justitiæ leges exigi possunt.

XX.

Hinc cum Deus noluerit peccata nostra per solam condonationem dimittere, intelligimus nedum quam maxime decuisse, ut condigna Divinæ Justitiæ satisfactio exhiberetur, quam præstitit Deus homo Christus Jesus, sed nec injustum fuisse pro nobis Christum subire crucis supplicium, eique peccata nostra imputari.

XXI.

Facta enim hypothefi, quod decreverit Deus, servato omni jure æquitatis, redimere captivum hominem deducere oportet, nullam creaturam a Divina persona hypostatice non assumptam, neque ad consortium, nexumque substantialem divinitatis erectam munus Mediatoris, ac Redemptoris implere posse tali soluto pretio, quod æquare valeat peccati magnitudinem, ac debitum prorsus delere, unde Adam Januensis canit

(a) *Ita salus hominis sub opaca male ferenda*

Tanti erat, ut totum natura creata vel omnis

Angelica humanum genus instaurare nequiret.

Hoc

(a) In hist. Domit. Passio.

Hoc autem non solum de redemptione hominum universorum intelligimus, sed etiam de rigorosa satisfactione pro uno dumtaxat impio propter peccati granditatem.

XXII.

Hinc ad Christi meritum nihil defuisse credimus: non defuit arbitrii libertas, cum oblatus fuerit, quia ipse voluit, & potestatem habuerit ponendi animam suam (a): non gratiæ ornamentum, quia plenum Spiritu Sancto, & gratia exornatum eum recognoscimus (b): non obedientiæ perfectio, servavit enim mandatum Patris, factus obediens usque ad mortem: non denique Dei præordinatio, ac promissio. Hinc ejus singulari obedientiæ retributum a Deo præmium exaltatione nominis sui, Patris glorificatione in universo terrarum orbe, nec non omnium redemptione, Justificatione multorum, atque electorum gloria, ut colligimus ex Isai (c) ex Joanne (d) ex Paulo (e).

Hoc igitur pretio captivi cum redimuntur,

Agnoscant quali conclusi carcere, quove

Obsessi fuerint morbo: quibus eripienda

Succurri haud aliter potuit, quam morte medentis (f).

Quod quidem si præstabimus, præterquam quod & nostram dignitatem agnosceremus, & consortes facti divini naturæ in veterem vilitatem degeneri conversatione haud quaquam redibimus, & sic adepti participationem generationis Christi carnis operibus perpetuo renunciabimus.

F I N I S.

(a) Isai. c. 52. Joan. 10. (b) Isai. c. 12. (c) Cap. 53. v. 10. (d) Cap. 19. v. 28. (e) Cap. 9. ad Rom. v. 9. 11. (f) Carm. de ingratis. cap. 53. vers. 43. S. Brosp. 10.